

奉天錄
平巢事蹟考
唐書直筆
讀舊唐書隨筆



江苏工业学院图书馆
藏书章

著一元趙

王雲五主編

叢書集成初編

奉天錄及其他三種

中華民國二十六年十二月初版

嚴朱

發行人

王

雲

五

長沙南正路

印刷所

商

務

印

書館

長沙南正路

發行所

商

務各埠

印

書

館

（本書校對者黃聿祥
潘同曾）

奉天錄序

緬尋大古之初。真源一味。自然樸略。不同浮華。雖垂不載。至軒轅氏征蚩尤而廓清四海。帝舜黜有苗而綏定萬邦。逮乎三王。則弔人伐罪。暴秦則兼并天下。漢高祖夷兇靖難。光武討叛懲奸。魏武破袁紹。晉武滅苻堅。宇文氏破高歡。普六氏平陳國。太宗擒王寶。肅宗定安史。故曰。亂者理之源。失者得之府。法令施而逆子誅。春秋書而賊臣懼。建中四祀。朱泚作亂。居我鳳巢。忠臣義士。身死王事。可得而言者。咸悉載之。使後來英傑。貴風義而企慕。承危伺隙。與時浮沉者。其徒非一。正史備書。故闕而不錄。志懷問鼎者。不敢漏網。口失簡書。直筆直言。無矯无妄。欲使朱藍各色。清濁分流。質而不文。焉敢潤色。恐史筆遺漏。故備闕也。李忠臣三朝名將。忽爲叛主之臣。洪經綸累代通儒。乃作趨時之士。其餘源休、蔣鎮之輩。敬忠、日月之徒。蓋屑屑者。何足道哉。每思南史之筆。班、馬之作。莫不廢食仰歎。且洪流壞堤。猶可塞也。烈火燎原。尙可撲也。逆臣賊子。難可邇也。睹此妖孽。搖動中原。莫不痛心疾首。是用書之簡素。使好我者慕。惡我者懼。元一代居關右。世業三秦。親睹櫓槍。媼妍必記。雖形闕奉親。而內懷其孝。身乖事主。而心荷聖恩。每覽嵇紹、紀信之高義。感千載而仰慕。尋淖齒、王敦之遺跡。思奮劍而誓心。疾惡之志。切于寤寐。起自建中四祀。孟冬月上旬三日。涇原叛命。終興元二年孟秋月中旬。有八日。皇帝再復神都。于中可否。總紀其事也。夫史館之筆才、識、學也。苟無三端。難以措其手足。元一不敏。敢竊鳳凰之一毛。以効騏驎之千里。獨學而無知。

孤陋而寡聞。跡不踐于邱門。文有慙于先哲。輕塵罕增于巨岳。墜露無益于廣川。輒申螢燭之光。將助太陽之照。述而不作。有媿老彭。冀革前非。用警來祀云爾。

奉天錄卷一

唐 趙元一著

建中四祀。先是襄陽節度使檢校右僕射梁崇義。自阻兵不朝二十年矣。上在春宮。情深憤惋。及登寶位。有誅四兇之志焉。詔劍南節度檢校工部尚書張延賞。東川節度御史大夫王邕。洋梁節度御史大夫賈耽。江陵節度檢校工部尚書張伯儀。淮揚節度司徒陳少遊。淮寧節度同平章事漢南漢北招討使李希烈。充都統諸軍平襄大總管。王命頒行。分路齊進。獸奮龍驤。謀臣盈幕。武旅雲萃。旗鼓纔施。兇徒瓦解。乘勝逐北。如巨海之沃螢光。漢水浮屍。似秋風之吹落葉。崇義之首。懸于朝矣。世祖昆陽。謝安淝水。各一時也。詩云。無拳無勇。職爲亂階。斯之謂矣。都統李希烈。自謂有尅敵之功名。居然有都襄之志。有詔勒歸本鎮。然生不諛之心。乃刼其郡。席卷而歸淮寧。凡掠良家子姓。悉爲賤隸。六畜資財。埽地而盡。昔太武瓜步迴師。六州無雞犬之響。游子望舍。不識舊廬。元兇之拔襄陽。甚于斯酷。遂縱師陷我汝州。河南尹鄭叔則表奏之。上命工部尚書兼右僕射哥舒曜。總禁兵五萬而討之。師謀士銳。所向莫敢有爭衡者。長驅築壘于襄城縣焉。時國家多故。河北幽冀。蝟毛蜂起。三輔兩畿。徵兵日繼。皇赫斯怒。爰整其旅。詔河陽節度御史大夫李芑。太原節度檢校工部尚書馬燧。澤潞節度檢校工部尚書李抱真。朔方節度太子少師李懷光。神策制將御史大夫異姓王李公晟。華原鎮遏使御史大夫趙令珍。分路長驅。深入賊境。雖王師頻

勝而寇亦不衰。勝負相參，殺傷萬計。時軍用既多，不遑遠略。戶部侍郎趙贊上封事，請稅三輔兩畿居宇間架，及取兩市富商大賈于西明、慈恩二寺置院檢納。貪吏深文，怨及社稷。太史奏曰：「窖門出天子，有詔去城七里內諸窖盡廢之，及泚稱兵，乃是涇原節度姚令言爲謀主也。」時哥舒曜孤軍無援，糧儲不繼，賊得其便，重圍數周。甲士日唯半菽，馬淘牆皮而芻焉。潛表請濟師。詔神策制將行營兵馬使御史大夫劉德信、御史大夫高秉哲各馬步共一十萬來救襄城。勅大梁節度使司徒李公勉發師犄角而攻之。軍書往來，同會于汝州之薛店。軍令不嚴，爲伏兵所敗。三將之師望旗大潰。戎器委數百里，鐵馬一萬蹄沒焉。洛陽士庶惶駭，北走河陽。西奔崤黽。東都尹鄭叔則入保西苑。唐漢臣奔于大梁。高秉哲、劉德信收離集散，駐軍于汝州。詔涇原節度姚令言赴援。總師五千，東之澧水。時京兆尹王雄屬吏置頓牛酒儉薄，將士已厲，遂傳箭而迴。十月三日巳時也。令言尙在紫宸殿，授以樞密，并賜資金帛。時御史臺左巡奏云：「涇原士馬違命迴戈，令言星馳至長樂坂逢之，有引弓射令言者，遂擁令言而迴。」上又使使勞問，賊已列方陣于通化門，門衛拒使者，強之而未及宣旨。言加不順。上又詔普王及諸王侍書等宣慰勞之，許以重賞。又載金銀帛繡等二十餘車。普王纔出禁城門，賊已至于丹鳳門。詔召六軍久無至者。時關東河北頻戰不利，屢發禁兵相次東征。警衛遂虛。上乃出自苑北門。六軍羽衛纔數十騎。或曰：「朱泚是失意之臣，恐懷僥倖，不如遣十騎捕之，使陪鑾輅，若脫于泉，爲害滋甚。」不然，以卒誅之，養獸招禍，立可俟矣。上與儲宮經略不遑，而賊已犯禁門。遂以普王爲先驅，皇太子爲殿。韋淑妃、唐安公主、親王、貴妃等一百餘人策騎而去。

乘輿次于咸陽咸陽令李衡俯集其妻親奉御膳上命貴妃以下接以恩禮傳飧而過神策軍使御史大夫白志貞等十數人扈從門下侍郎平章事盧杞中書侍郎平章事關播御史中丞劉從一戶部侍郎趙贊右羽林軍使御史大夫令狐建京兆尹王雄駕部郎中郭雄翰林學士陸贄吳通微等悉于咸陽而及焉郭曙與家僕數十人于苑中獵射聞蹕伏謁道左上宣勞之志願翊從上許之駙馬郭曖先與宮主失意上收宮主在內隔絕經年及此曖馳往覓得公主策騎俱赴行在三日夜四更至洛驛奔及乘輿四日平明至于奉天承尉惶懼拜舞于縣門其日上幸縣令宅宰臣近侍各居廨署時右金吾將軍御史大夫渾公瑊討賊之迴戈也渾公與家僕數十騎自夾城入北門收集後殿與敢死之士欲擊賊乘輿既出遂奔行在上以渾公爲工部尙書行在兵馬使渾公有膽略泚素憚之旣而乘輿乃安時奉天備禦防守皆渾公之謀也君子曰高祖困于彭城而用陳平之策漢祚興焉晉武得謝安石晉室無替古君子亦有是夫渾公雖武勇絕倫而謙讓無匹乃以令狐建爲行在中軍鼓角使嗣滕王湛然爲金吾大將軍嗣鄒王寓爲右衛大將軍前神策軍京西都虞候侯仲莊爲金吾衛將軍兼御史中丞奉天防城使兼右廂兵馬使仲莊有剛勇善謀略保衛之功次瑊之勳也初建中之始術士桑道茂奏云國家不出三年豎有離宮之象臣望奉天有天子氣宜制度爲壘以備非常上以道茂言事數驗遂令京兆尹嚴郢充築城使具畚鍤抽六軍之士督策之時上初卽位刑清俗泰盛夏而土功大興遠近不知其旨及此都焉上初幸鳳翔依都府而謀尅復或曰張鎰雖陛下信臣蒞職日淺所管勁卒皆朱泚部曲本漁陽突騎兇衆城中旣立

朱泚本軍必生大變。以臣度之。非萬全之計也。敢以死請。上亦悟道茂之言。遂改幸奉天。至其月六日。李楚琳殺張鎰而歸朱泚。初。令言陣于五門。禁兵不出。百姓觀者巨億。遂整旗吹角。入含元殿前。先鋒自龍尾道上于中間。周呼曰。天子已出。今日共取富貴。兇徒大呼有頃。入宜春院及諸宮。時倉忙之際。本朝禁衛騎士及坊市百姓。擔負財帛。填街塞陌。連日竟夜。旣而羣盜與令言謀議。慮難持久。或曰。太尉朱泚久囚。必生異志。若迎而爲主。事可捷矣。遂于招國里以禮迎之。泚畜姦伺隙。久懷非望。羣盜旣至。僞讓不從。而命爲使者。設食久之。以觀衆心。于是火燭星羅。觀者萬計。泚入居含元殿。四日平晨。出榜。榜曰。太尉權臨六軍。○原作臨六年依秦刻改與通鑑合國家有事。東郊徵涇原師旅。銜命赴難。將士久處邊陲。不閑朝禮。軍驚御駕。乘輿已出。夜定。見神策六軍金吾威遠英武并百司食糧者。三日內並赴行在。不去者。卽于本司著到。如三日後移牒。勘彼此無名。當按軍令。議無容貸。泚移居白華殿。朝臣見者。悉勸迎駕。泚顧望錯愕。知未得衆心。源休入移時。籌之言多不順。勸以僭僞。泚甚悅之。猶尙未決。上初巡幸。京城朝官莫知上所在。分路探候。然後乃知。源休旣陳矯計。切勒十城門。不許出入。時六日夜也。上初入奉天。有上封事言叛兵共立朱泚。兇徒必來攻城。請爲備禦。門下侍郎盧杞切齒言曰。太尉忠貞。朝野共知。柰何有此。傷大臣之心。安可令泚聞之。請以百口保泚不反。後二日。泚變梟獍。至于城下。上料近藩兵馬。可以赴難者。頒下手詔諭之。皆如期至。帝尙以忠臣待泚。又知公卿勸迎。且令諸道軍士三十里下營。時京兆府功曹姜公輔赴行在。拜門下侍郎平章事。俯伏而奏曰。王者不嚴衛。無以重威靈。今禁旅單寡。翊衛未備。若泚忠孝奉國。固不

以兵多爲慮。若狼心已變。則有備無患。今士馬在外。深爲陛下危之。卽日召兵入城。逮泚攻城。已戒嚴矣。朱泚旣納源休僭僞之說。又得幽隴三千人。與哥舒曜救援。行至澠池縣。聞朱泚僭僞。返旆投泚。泚自謂衆望所集。于是以源休爲京兆尹。判度支。李忠臣爲皇城留後。泚以段秀實爲心膂。發銳卒三千。奉迎乘輿。陰起逆謀。秀實潛謂劉海賓曰。朱泚是薊門一卒。去逆効順。先帝嘉之位。登台輔。不能見危授命。而乃晏安兇醜。吾位歷司會。策名九寺。雪國之恥。雖死猶生。爾能從乎。海賓曰。忠臣節義。死而不亡。敢不唯命是聽。因擇能行者追賊兵。曰。城中有變。使者六日一更行。及洛驛。虜劫而迴。驗符。乃秀實詐爲賊帥姚令言帖。用司農寺之印也。賊泚用仇敬忠爲同華等州節度使。拓東王以禦王師。用異姓王李日月爲西道諸軍事。經略使。上初至奉天。用御史中丞高重傑爲平虜使。屯兵于梁山之西隅也。時與李日月頻戰。官軍大捷。後被伏兵。死于鋒刃。朱泚出榜兩市。及署兩坊門曰。奉天殘黨。蟻聚京畿。重傑等仍敢執迷。拒我天命。朕使偏師小將。果復敗亡。觀此孤城。不日當破。雲羅布網。無路鳥飛。鐵釜盤魚。未過瞬息。宣布遐邇。各使聞知。僞兵部員外古之奇詞也。初。重傑縱騎追賊。獨出于三軍之首。兇徒埋伏邀之。落其奸。便被兇徒生擒。親事數十人。以伏事之情。亡軀而奪之。兇渠雖衆。追者氣銳志堅。奮然不顧。遂被逆黨斫重傑頭而棄其身。親事收其神柩。入奏于奉天。帝見之。撫屍而哭。或諫曰。裨將死。撫屍而哭。越禮也。帝曰。大禮非卿所知也。艱虞之際。死于王事。愍惻豈拘常倫。遂盡哀而哭之。命有司造蒲頭。安之頸而埋之。朱泚得高重傑頭。又集僞百官大哭曰。忠于彼者。亦義于此。爲朕之無禮。殺我忠臣。又命僞有司作蒲人身而安其

首以三品葬之。皇帝再尅京師。詔有司發舊二塋。取其首。別爲封樹。贈工部尙書。喪葬官給。時李日月兇威甚銳。燒蕪陵廟。帝甚患之。謂渾公曰。朕不能保守宗祀。尅平多難。致使六合沸騰。宗廟失主。焚我陵闕。兇威轉熾。應是殷憂之時代。終百六。唐堯禪舜。虞舜禪禹。自古有德者進。無德者讓。有自來矣。今天地鼎沸。淮楚搖蕩。幽冀蜂起。萬方震懼。請從禪代。以救蒼生。卿等如何。渾公泣涕如雨。身被鐵甲。舉身自撲。君臣悲淚久之。渾公奏曰。夫聖人不困不成王。烈士不困行不彰。昔高祖迫于項籍。世祖窘于昆陽。隋文帝厄于雁門。魏武保于南郡。三王五帝。其猶患諸。況陛下承百王之末。威靈邁往古。小有述否。而懷扼腕。臣下之罪也。願陛下以社稷爲念。無以小賊爲憂。臣請自出一行。梟逆賊之首。卽冀宗社永安。唐堯垂拱。臣之願足矣。上曰。朕在蒙塵。卿爲肺腑。別募裨將。卿不可也。渾公曰。北狄恃金牙之威武。頻犯郊畿。鄂公取之。若指掌。臣若不行。兇威轉甚。上許之。渾公先以數十騎從西門出。埋伏于莫谷之隅。公自將數十騎從東門而出。直抵朱泚營壘。泚驚。不覺墜榻。羣盜大潰。公以騎少。不足逞銳。遂引而西。李日月縱騎追之。至城西門。渾公謂家僕曰。立功立事。只在今日。與卿此捷。何不取之。僕人彎弧射之。李日月應弦而斃。朱泚鋒刃十亡八九焉。家僕者。卽渾公之所役人也。字小金。有詔令公賜姓李氏。封異姓王。以賞飛矢之捷。用旌武功也。初。李日月。中矢而死。朱泚備禮。送于長安。休祥私第。母氏苛尅而不哭。厲聲罵曰。奚奴。國家負汝何事。敢生悖逆。死猶晚矣。朱泚備禮而葬之。母氏始終不哭一聲。皇帝行在。亦知之。及李晟收長安。諸黨並從夷戮。唯李日月母存而不問。君子曰。馬服君婦有知子之鑒。而免禍。李日月母以子叛恩。存大義。

而不哭。殊有古人之風。初朱泚謀變大事。李忠臣、源休等並皆同坐。司農卿段秀實與劉海賓伏匕首于靴中。內官覺之。時聖上行幸。羣臣疑貳。革亂之間。段公以戎服見泚。共議匡復。往返三四焉。泚情洩于言。段色厲。奪休之笏。擊泚之首。羣兇駭愕。濺血數步。兇黨持兵而至。段公被害。泚一手承血。一手指羣兇曰。義士勿殺之。聲手相及。段公已害。泚哭之甚哀。封忠義侯。以三品禮葬之。海賓因兵亂而逸于通化門外。被役驢者敗之。並見害。故京師號朱泚爲熱熟堯舜。號希烈爲當年桀紂。時有風情女子李季蘭。上泚詩。言多悖逆。故闕而不錄。皇帝再尅京師。召季蘭而責之曰。汝何不學嚴巨川。有詩云。手持禮器空垂淚。心憶明君不敢言。遂令撲殺之。贈秀實太尉。謚曰忠烈。賜實封五百戶。莊宅一所。嗣子授三品正員官。諸子各授五品正員官。旌其門閭。喪葬官給。爲立廟。御製碑銘。君子曰。昔臧氏勸事君之節。空傳其名。不睹其人。千載之後。見乎段君。代有之矣。伯仁抗節。鍾牙咄嗟。有是哉。詩云。淑人君子。其德不回。其段公之謂乎。

奉天錄卷二

八日。泚于宣政殿僭卽大位。愚智莫不血怒。衛者多是軍人。周行不過數十。自稱大秦皇帝。年號應天。僞赦書云。幽囚之中。神器自至。豈朕薄德所能經營。彭偃之詞。冊文。太常少卿樊系之撰。文成服藥而卒。故嚴巨川詩曰。烟塵忽起犯中原。自古臨危道貴存。手持禮器空垂淚。心憶明君不敢言。落日胡笳吟上苑。通宵虜將醉西園。傳烽萬里無師至。累代何人受漢恩。九日。李忠臣。姚令言並爲侍中。仍以令言爲關內副元帥。以光祿卿源休爲同平章事。兼京兆尹。判度支。工部侍郎蔣鎮同平章事。蔣鍊爲御史中丞。太常卿敬釭爲御史大夫。洪經綸爲中書舍人。禮儀使。是日夜三更。哥舒曜拔襄城。保于洛陽。初。公援東郊也。上謂公曰。卿行師出陣。與卿父何如。公再拜而對曰。先臣臣不敢比也。祇如斬長蛇。殪封豕。靜氛霧。掃機槍。然後待罪私室。臣之願也。上曰。伊尹去而伊陟嗣。文王沒而武王興。卿父在開元。無西面之憂。朕今得卿。無東郊之慮。及師發之日。上親送于通化門。百官翼戴。觀者萬計。則曰。茫茫楚塞。遙瞻上將之星。謁謁秦郊。自有登壇之客。豈惟漢稱定遠。晉有征南而已哉。及乎出師于通化門外。無故門槍自折。識者知其不利。以其父翰。天寶之末。師至乎北門。無故門旗自折。翰遂斬門旗官而發師旅。終有火拔控轡之難。公此行踵父之徵。遂有襄城重圍之難矣。初。公駐軍于襄城也。希烈莫不懾懼焉。有枝梧之象。時公亦以名父之子。不忝其役。實欲立功成事。待罪私室。但國軍多故。糧盡援絕。三將敗績于薛店。城中戰士中矢者

十有八九焉。城外兇衆飛矢拋木者，壕塹俱滿。公堅守孤城，糧竭于內，援絕于外。軍志曰：設有金城湯池，帶甲百萬，無粟者不可守也。公遂拔城而遁焉。詩云：昊天不備，降此鞠凶。昊天不惠，降此大戾。時希烈兵勢漸盛，南破張伯儀，北敗哥舒曜，縱師攻汴州。都統司徒李公勉棄城而逸，擁衆而投宋州。大梁遂陷，江淮震懼。賊旣入城，資賄山積，河路斷絕，長安以東飛書不通。南方貢使皆自宣池、洪饒、荆襄抵武關而入。江西節度嗣曹王皋嚴口郵驛，厚其供億，雖有深溪絕橋而駟騎不病，四方賴焉。司徒李公旣已敗績，詔以宋汴節度劉公洽充河南道都統諸軍事，悉以司徒所管配隸焉。司徒公制將曲環前後數陳行列，軍事司徒公多不從其計。環以司徒公行軍司馬陳履華兵馬使唐漢臣、李載等用事，多阻環計，不及與諸將同語。司徒公以不從其策，自維敗績，但唯唯然。環因叱履華曰：都統置公腹心，遂辱吾軍，命左右掣之下馬，極加責讓。司徒李公、大夫劉公皆釋轡錯愕。司徒深自抑退，以愛惡不明，無所逃于國典。大咎在勉，非陳中丞之過也。大夫劉公謂環曰：軍有利鈍，時有否泰。昔孟明三敗以成功，良史稱其美也。曲大夫豈得失禮于上公，環乃止之。司徒公以軍敗失士，上表請罪，上已出宮，覽表潛然，謂勉曰：朕亦不能上保宗廟，越在畿甸，軍國之事一勝一負，卿其自安。因待之如初。十日，制將劉德信、高秉哲聞帝蒙塵，遂拔汝州，星夜兼馳于沙苑，監取官馬五百匹，先收東渭橋。于是天下轉輸食糧在此焉。軍次昭應，列陣于見子陵之西隅。二將執醕，號令三軍曰：今主上蒙塵，神器無主，長蛇逸網，魚脫于泉，臨難成功，冀在憂危之日，剪除兇黨，尅復乘輿，勳流子孫，萬代之貴。言訖，左右戒嚴。三軍賈勇，鼓聲一振，奮戟前衝，三覆其軍。王師大

捷乘勝築壘于東渭橋。時十月十九日也。初十日朱泚自統衆攻奉天。羣卒不遑禮儀。蟻聚之衆。軍勢漸雄。以姚令言爲僞元帥。僞右僕射同平章事。張光晟屬焉。以李忠臣爲京都留守。十二日賊次洛驛。上使中使翟進追論惟清。○通鑑作翟文秀。慶州刺史。此疑有譌脫。邪寧留後兵馬使韓遊瓌。士馬三千八百人。二將受詔。夕

而奔命。夜到泥泉。遲明卽路。遊瓌等命其軍士分部巡探。東道遊奕人爲賊所獲。將送泚。泚問救軍多少。泚左右抑令蹈舞。賜衣一副。付僞詔書宣慰。先歸者待以高爵厚賞。遊奕人馳還。當夜發。至四更。關門納之。惟清、遊瓌等再拜舞蹈。悲喜交見。上膝之前席。謂清曰。兇孽滔天。宗社不守。貞貞之節。見于艱危。卿等急于國難。朕無慮也。二將宣布聖旨。將士莫不感激。時涇原都知兵馬使馮河清進戎服甲楯。垂十萬焉。上大悅。立頒將卒。軍聲遂震。十三日辰時。賊軍大合。城下交戰。自辰接戰。至于申酉之間。賊徒大敗。殺傷萬計。是夜賊于城東三十里下營。周徧原野。擊柝之聲。相聞廣陌。又修攻具。上亦命造戰樓。拆佛寺及仇敬忠宅而豐其用。賊若乘城而戰。賊多敗衄。若出師戰。王師少利。十七日。靈鹽節度留後使御史中丞杜希全及鄜坊節度工部尙書李建徽各率甲士三千人趨奉天。賊氣方銳。設伏于莫谷。三軍深入。探候失備。奸人得計。便夾而擊之。爲賊所敗。希全等收離集散。再震其軍。初泚于奉天城東南隅下營。立表高百尺。造木檻。人藏其身。縋而上之。闕我城闕。帝深患之。召善定砲者。拜御史中丞。實封三百戶。有崇福寺僧昭悟。夜應召而中之。人檻俱碎。泚不復更置。遂白日移帳于乾陵上南望之。遂有雲梯之役。車駕還京。與昭悟官爵。昭悟懇辭不受。請充別敕崇福寺主。有詔依請。時劉德信、高秉哲固守渭橋。往往出師遊奕于

望春樓下。設伏皆敗績。僞皇城留後李忠臣。移牒奉天城下。請救兵。時姚令言。士馬敗績。傷者衆。恐百姓乘弊而俘之。所抽救援將士。皆匿刀箭。夜行晝伏。泚既迫急。召機巧之匠。設以雲梯。刻日而就。其梯高百尺。闊十二丈。梯上可置五百力士。城中士庶。莫不惶駭。上深懼之。顧問百官。時神武軍使御史大夫韓澄。拜而奏曰。臣昔在劔南西山八州防守。戰具備諸雲梯小伎。不足上勞神慮。請禦之上。曰。昔沛公困于項籍。而得韓信。寡人今迫于重圍。上天以卿賜朕。千載一時。卿其勉之。時韓澄親受聖策。潛穿地道。嚮彼來路。布乾馬糞二百車。以爲火備。城上更廣城牆。當雲梯相對三十步。以大鑊十口。各煎膏油。散布雲梯之上。細剉松脂五十車。內庫陌刀五千口。白刃如雪。排次如鱗。城外羣兇三軍齊叫。雲梯既動。鋒鏑雨集。城中木石。飛聲雷震。俄頃之間。雲梯腳陷。前不得進。後不得退。初。梯上有濕氈。矢不得入。梯腳將陷。烟火爛然。從地而出。雲梯之上。人自去氈。于是葦縛雲飛。松枝亂下。熱膏雨散。中者逼人。脂傍流。凡數百步。洪爛千尺。白日爲之韜光。沸聲若雷。知漢將之謀也。縱田單有火牛之策。不可同年。陸伯言有白帝之功。方堪季孟。此韓澄之計也。拜鹽夏節度左三軍統軍。初。雲梯之動也。風勢不利。咸以爲憂。渾公親率列將。酌酒臨火坑而呪曰。天道助順。志誠感神。賊泚兇悖。圍逼君父。乾坤不昧。宜降大罰。因流涕被面。精神感激。拜訖。須臾。大風起。吹賊軍勢益加。潑油下脂。鼙鼓齊震。王師大捷。賊敗衄焉。時十一月上旬也。城中雖有雲梯之捷。素無藁草糧儲罄竭。賊圍益急。戰士多損傷。皇太子親爲封裹。巡城慰勞。有頃。賊射百張弩。于上前三步而下。上大驚。謂渾公曰。雲梯雖捷。賊勢尙強。位歷之數有窮。三皇五帝尙有革易。朕自無德。上